

Yuda

Yudaŋo Miti Kine Qeke

¹ Yuda, na, Yesu Kristo wane urata ŋei, so na Yakop wane ŋole, noŋo Anutuŋo ŋidora newan ŋungi sari Anutu Magak wane wet maepko Yesu Kristo ŋo korautŋungi aŋaine teweke gemami, ŋine kibi iwa qe ŋibonmaile.

² Wet menaŋ, peam so wet maepŋo maine ŋinano watkeware payake.

Isi Kito Ebo Ebon Ŋei Eŋane Girem Don

³ Kima maep kopne, na Anutuŋo urata maki paki ŋei ŋerep korop ŋebu mainŋone eŋino biranŋonge, ea wane don kisiine qe ŋibonikalane zok nan okanmaike, pakimo ukude yemo don iwa yale qe ŋibonmaile, naso maneo me korop Anutuŋo ŋei ŋerep magukoune mali malip wane numa makoboe ŋebonge, yewa isisi ŋei, mali malip wane ŋabaine gemami, edo kito ŋibonikei wane, ŋine togole more mali malip yewa wane diamine maikei, paki isisi ŋei eŋane don yewa qe esopkau ariake.

⁴ Ŋei natne Anutu midaine, eŋe mo sanko sari doku tau tau magu keuzo ketkoi, eŋe keuzo maine gemaine, so eŋe doku tau tau magu tanik geu paki, mitiene midaine okane bailalaŋ urata ma okan okanmami, paki eŋe kine kineene Anutu wane don maineŋo kawetka more doku tau tau tanik so koboine yale ge ma okanmami, Yesu Kristo ŋenane Suaineze so Waomze weku

qaisikka okanmami. Mokaka Anutu wane Papiao nei yaline enjane don iwa yale qekoi, nei yaline enjane Anutu wane kaitko seu seu wane binjek okangoi gemami.

Mokaka Turunjine Zinge Ebonge Enjane Don

⁵ Njine don kisi mo detwaremami, njo na koso yewaka qe wirike njidanbe, Waom enjane Israel nei njerep Ezipt kepeo njine ebu seseone sarike, njo silun enjane keueno njine nei njerep natne enjane njado anjane birau paki donine qelige njadekkau, Waomnjone qelinjongi seukwarekoi.

⁶ So anjelo ware ware urataene kito qoke more ennjene kepe matene qelinjakoi, enjane papa togon wane mulap togogolejo kie meteene wokonge more qei panaman kotino biraonge, yewao Anutuno ma peseongi Naso wane toma pamami, Naso yewa bomileki banj turunjine eboniake, enjane don urata suaine Anutu wano maikeli ea wane toma pamami.

⁷ So Sodom, Gomora so mat loli lolik mere arike, eawane nei njerewekoune enjane anjelo edo okangoi, tanik yalewaka okangoi, enjane bailalanj okane borikine kine kine yau yaup nei njerep auye ma ariu madoj madojine zok wakonge, yale okanbi, Anutu gerep togongo biraongi ket warekoi, wikile dere gemami, eamo korop njenane girem yewa didiwo detkanjem paki kaetnjongi, tanik borikine yewa mi okangene.

Miti Matali Matali Nei Enjane Don

⁸ Rokop yalewaka Nei Matali Matali iwa enjane kulu kau yewano wetene maingeki ennjene solaene tutule yewa borikine ma okanmami, paki

Waom ebu ket biraone more, qeliwo aŋelo qeli ewe zonomenerop eŋe mabaikon okanmami.

⁹ Mokaka, Mikael eŋe aŋelo ŋetneene, ŋo Satan gorop Mose wane pareŋinane sorin nagu more Satan rake “noŋo makale”, raki aŋelo Mikael rake, “noŋo makale” raki sori sorin au more Satan don borikine olasiakane detki, qekake, paki iwa yaleka olatke, “Waomŋo turuŋine giniake.”

¹⁰ Ŋo ŋei iwa eŋe kine kine korop yewa wane mabaikon okanmami, ŋo eŋe ea wane kine mi detmami, ŋo tanik kine kine korop kineine detmami, yemo osom eŋane rokop dereretene midaine, eŋe yaup wetene ŋoka okangei.

¹¹ Yai, eŋe ge mage daleo okangei? Kainŋo ŋole qe more sot ma wakonge, numa yewa mogare gesokmami. So mane yemo, Balam eŋe Israel wesi wane soakone more, Anutu wane kaitko sot ma wakonge, ŋine yale waka wesi aboŋ wane bailalaŋ okane more solaŋine qaisikau sot turuŋ Anutu wane kaitko okanmami. Korano sogino Anutu wane urata ŋei Mose yuankayakane okane more, Anutu wane don qeki paki sot maratki paki seukke. Ŋine yale waka Anutu wane urata mama ŋetne yuanka more, numa eaka gesokeiwo, ŋei yaline, Anutuŋo mataliŋungi siukke mida lelekei..

¹² Ŋei yaline eŋe sigit diinerop, ŋinane ruo ŋara nene lewa lewaŋ ŋino ŋara soep wane batneka sari sarine gamuene midaine, ne bat oka okane, yale. Eŋe weku enŋeneka warenagu okanmami, ŋei yaline eŋe kezoŋ momoŋo tewekone arimaike, paki koya mi waraŋka sarimaike wele midaine, yale. Eŋe eki wele qe qe nasoeno wele mi qe okan mami, paki ŋodoenerop lokake

qakɲem pa seuk okanmami, ea wane rokop.

¹³ Eɲe kiwet dibomineɲo suamaike yale, Borikine kine kineene gamuinerop yewa wane sopolopotne didiwo wakon okanmai ke yale. Eɲe serekin edo qeliwo yau yaup ari okanmami yale, ɲei yaline eɲane mat urum yemo di panaman papa togon, yewao naso baɲem gekeiwane Anutuɲo binjek qe ebonge.

Enokɲo Nasoo Turuɲine Maratkaikenane Done Ra Wakonge

¹⁴ Adam wane doko ɲosa ɲabokoune wakone sarimage atak 6 okangi Enok wakonge, pakimo Enokɲo mokaka ɲei borikine yaline eɲane don iwa yale eɲane kineene ra qelaɲane edange, “Kau! Waom eɲe baɲ aɲelo magukoune koboboine, tausen magu suaine eɲerop lotkekei,

¹⁵ lotke more, ɲei ɲerep korop kineene ma wakon wareake. So ɲei Anutu midaine borikine mama, eɲe borikineenane turuɲine makoke ebon wareake, ɲei Anutu midaine, borikine mama eɲe sigit borikine korop okangoi, so masi tanik borikine mi oka okane yewa korop ra ma okane Anutu ɲabakakoi!”

¹⁶ ɲei yewa eɲe naso baɲem qouɲ qouɲ kito more, ɲei natne bokaon okan okanmami, eɲe borikine kine kine wane simile dɛre more ea mogare ari okanmami, eɲe wawaine don rau paki enɲene solaene mawa nagu okanmami, eɲe ɲei natne kelok okanone more aboɲ kine kineene yaup ebuma okanmami.

Girem Don

17 Njo kimakop, njine yemo Waomze Yesu Kristo wane aposolokoune edo don rakoi, yewa dere malipkaikei.

18 Ene iwa yale njidangoi, “Ban Naso goeakane okangi nei natne wakone more Anutu bat mau paki tenikjunikei, paki Anutu midaine gege, enjene numaene borikine yewa mogare geu paki Anutu njadekkaikei.”

19 Nei yaline ene doku tau tau magu mapok qepok okanon okanmami, ene kepe nei enjane dereretka mogare ge okanmami, paki Asu Koboboine midaine wet seuseune gemami.

20 Njo kimakop, njine yemo naso banjem mali malip koboine wele yewano nabok okanngungi takorakot togole ge arikei, paki Asu Koboboinane zonomgo naso banjem menjenka gekei.

21 Yale, okanbi paki Anutu wane wet maepko bororom gekei, so Waomze Yesu Kristono wet peseinane gege togon njiboniakane tomaka gekei.

22 Nei natne wet etkeka gemami, enjane wet borik desikei.

23 Paki mapitone more gerep bolam koto njine ebuwi sakesikei, so nei natne enjane wetnjine wenen boriki enjenane eweene kitomore mapik onikei, paki takot laplapene borikineenejo maki panaman oka okane, yewa qikka kakakkaikei, yewa yemo Anutu wane kaitko me deino mo kine kine yaline ene korop panaman so borikine okan waremai.

Bakom Meje Mejen

24 Waomzenjo kito qesinj okanngune more warengune lukki, mi ket rasukei, ea wane mi

ḡaḡaemaikē, paki ḡibuki sot midaine so oi bakom gorop qeli ewe zonominane kotino lotkekei, Anutu weku, eḡano lotkekei.

²⁵ Eḡe Anutu weku, eḡe Waomze Yesu Kristo wane ra more qesi qesiḡze gemaikē, eḡe eḡetine mawakaikene, kibi qelaḡanso qeli ewe zonominerop, ḡei Waomze weku gemaikē, eḡe zomine kakapa, so kine kine korop qeli kotino so kepe kutno pa waremaikē ea wane lewet. Eḡe mokaka geke, so ukude gemaikē, so baḡ naso baḡem takorakot ge ari geake! Weleka.

Waom Yesu Wane Sigi Maep Don
The New Testament in the Ono Language of Papua
New Guinea
Nupela Testamen long tokples Ono long Niugini

Copyright © 1991 The Bible Society of Papua New Guinea

Language: Ono

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

PDF generated using Haiola and XeLaTeX on 18 Apr 2025 from source files dated 31 Aug 2023

646541a1-8d36-5993-802c-6bb850da5963